

**PARLAMENT FEDERACIJE BIH  
PREDSTAVNIČKI DOM**  
*n/p Zastupnicama/Zastupnicima*

Sarajevo, 28.02.2024.  
Broj: 23/24

**PREDMET:** *Obraćanje povodom 6. tačke Dnevnog reda 10. redovne sjednice Predstavničkog doma Parlamenta FBiH*

Uvažene zastupnice i zastupnici,

Obraćam Vam se cijeneći da ćete u ponedjeljak, 4.3.2024. godine, biti u prilici da se izjasnite o Nacrtu Zakona o unutrašnjoj trgovini FBiH koji je u proceduru uputila Vlada FBiH, a koji u tački 17. predviđa da će trgovački objekti biti zatvoreni u dane praznika i nedjeljom. Borba za slobodne praznike, ali i inicijativa za zatvaranje objekata nedjeljom, dugogodišnja je borba Sindikata radnika trgovine i uslužnih djelatnosti BiH (STBIH) koji vodimo ne samo u ime naših skoro 14 hiljada članova, nego i u ime svih radnika i radnica u ovom sektoru. O razlozima zašto i argumentima kojima ovu inicijativu potkrepljujemo neću ovom prilikom. Govorili smo o tome godinama, a oni klubovi zastupnika koji su pozitivno odgovorili na našu molbu za sastanak imali su priliku to već čuti u ove dvije sedmice. Ovu priliku bih htjela iskoristiti kao bih Vas još jednom podsjetila na odgovornost koju svi zajedno imamo kako bismo radnicama i radnicima u trgovini u FBiH pokazali da još uvijek imaju razloga da ostaju u ovoj zemlji i kako svaka nada da ima neko u ovom društvu ko brine o tom tzv. realnom sektoru nije potpuno izgubljena.

Mnogo puta su radnice i radnici u ovom sektoru izigrani. Ubjeđivani su kako su veoma bitan dio društva, a bili su na prvoj liniji fronta tokom covida, radeći bez zaštite, bez naknade, u gotovo ratnim uslovima, da bi nakon toga ponovo od heroja postali radnici na marginama. Obećane su im veće minimalne plaće, a čuli su samo za veće plaće svojih kolega iz javnog sektora. Svakodnevno su žrtve pljački i razbojništva, rade u nesigurnom okruženju, u vrlo teškim uslovima. Oni su prodavači, ali i komšije, psiholozi i prijatelji svima nama svakodnevno. A ovo društvo i njegovi najodgovorniji predstavnici im dosad nisu pozitivno odgovorili niti na jednu njihovu molbu.

Nije slučajno da ovo obraćanje, kao i sama sjednica na čijem je Dnevnom redu ovaj Nacrt, dolazi neposredno uoči i nakon 1. marta, Dana nezavisnosti BiH. Ponovo će jedan ogroman dio radnika ovog sektora do kraja druge smjene 29. februara čekati na „muštuluk“, odnosno dobru volju svog poslodavca da li će ovaj, jedan od najznačajnijih dana u novijoj historiji BiH, dočekati praznično, neradno. Istina, veći broj njih će zaista biti slobodan 1. marta. Ne zato što se ovo društvo pobrinula da privilegiju „praznikovanja“ osigura za sve radnike, a ne samo za one u javnom sektoru, već zato što je pritisak javnosti svake godine sve veći. Ali jako puno njih još uvijek čeka na tu „privilegiju“ 32 godine, nakon tog jednog od najznačajnijih dana u novijoj historiji BiH, to za mnoge radnike i radnice u trgovini još uvijek nije praznik.

Uvažene zastupnice i zastupnici, Vi to konačno možete promijeniti. Je li to moglo nekim drugim Zakonom? Je li bio neki drugi način? Naravno da jeste. I naravno da smo i to pokušali. I naravno da bismo to željeli. Ali to se dosad nije desilo. Za sve ove godine ovo je jedini korak ka minimumu dostojanstva koje ovi radnici zaslužuju. I upravo to Vas u njihovo ime i molimo da uradite. U prošlom sazivu vlasti ovaj Dom je propustio priliku da pokaže odgovornost i brigu o ljudima koji rade u sektoru koji generiše najveće učešće u BDP-u BiH. Sada svi zajedno imamo priliku za popravni ispit spremnosti da pokažemo da nije bitno ko je predložio neki Zakon. Nije bitno da li on dolazi iz pozicije ili opozicije. U konačnici više nije bitno ni šta u njemu piše. Ono što je bitno je da je to ono što žele radnice i radnici u trgovini i što im Vi svojom podrškom možete i dati. Ako ne vjerujete nama, uđite u prvu trgovinu u svom susjedstvu i pitajte. Vjerujemo i iskreno se nadamo da ćete u tu trgovinu uskoro ulaziti ponosni na odluku koju ste donijeli.

U tom cilju Vam se, u ime skoro 100 hiljada radnica i radnika u trgovini, zahvaljujemo na razumijevanju i odgovornosti.

S Poštovanjem,

